

ԸՆՏՐԱԿԱՆ ԳՈՐԾԸՆԹԱՑԻՆ ՆԵՐԳՐԱԿՎՈՒՄԸ՝
ՈՐՊԵՍ ՔԱՂԱՔԱԿԱՆ ՄԱՍՆԱԿՑՈՒԹՅԱՆ ՏԱՐԱՏԵՍԱԿ²⁹
(ՀՀ ՕՐԻՆԱԿՈՎ)

Առնակ Սարգսյան

Բանալի բառեր՝ ընտրական գործընթաց, հանրաքվե, ակտիվ ընտրական իրավունք, պասիվ ընտրական իրավունք, ընտրական իրավունքի սկզբունքներ, ընտրական գործընթացի փուլեր:

«Քաղաքացիական ներգրավվածության» և «Մասնակցության» մասին խոսելիս պետք է նշել, որ դրանք հաճախ օգտագործվում են որպես փոխադարձաբար փոխարինելի հասկացություններ, այսինքն՝ գրեթե նույնացվում են: Այս պարագայում կարծում ենք, որ դժվար է հստակ տարանջատում կատարել տվյալ հասկացությունների բովանդակության միջև: Նշենք նաև, որ մի շարք մոտեցումների համաձայն՝ «մասնակցություն» հասկացությունը դիտարկվում է որպես «քաղաքացիական ներգրավվածություն» հասկացության մի մաս, դրա առավել ինտենսիվ և կազմակերպված դրսևորում: Ջարգացման նախաձեռնությունների և դրանց մասը կազմող հայեցակարգերի՝ քաղաքացիական ներգրավվածության և մասնակցության քաղաքականության կենսագործման ընթացքում արդիական է դրանց իրագործելիության և փաստացի դրսևորումների չափման խնդիրը [1]:

Քաղաքացիների ակտիվ մասնակցությունը պետության կառավարմանը է ժողովրդավարության և հզոր քաղաքացիական հասարակության կայացման հիմնական սկզբունքներից մեկն է: Ժողովրդավարությունը մի գաղափար է, որն իրականանում է, երբ քաղաքացիները ակտիվորեն նվիրվում են քաղաքական կյանքին: Ժողովրդավարությունը ժողովրդի կառավարումն է հանուն ժողովրդի և ժողովրդի համար: Ժողովրդավարության առկայությամբ մարդը ծայն ունի իր կյանքի կառավարման գործում: Պետք է նշել, որ քաղաքացիների ներգրավվածությունը քաղաքական կյանքին կախված է կոնկրետ իրավիճակից, քաղաքական համակարգի բնույթից, ինչպես նաև մարդուց: Վերջին հաշվով՝ մարդն ինքն է ստեղծում քաղաքական կեցություն սեփական քաղաքական գործունեության և հասարակության մեջ իր վարկելակերպի միջոցով:

Քաղաքական մասնակցության բնույթի և ուղղվածության վրա էական ազդեցություն ունի հասարակության քաղաքական մշակույթի մակարդակը [2], որն արտացոլվում է ժողովրդավարական արժեքների և ինստիտուտների ընդունման ու ընկալման մեջ: Այստեղից մենք կարող ենք ենթադրել, որ հասարակական գիտակցության մեջ որքան բարձր են ժողովրդավարական արժեքները, այնքան բարձր է քաղաքական մասնակցության աստիճանը: Եվ հակառակը, որքան ցածր է ժողովրդավարական իրավունքների և ազատությունների նշանակության աստիճանը, այնքան բնակչության զգալի մասի մոտ նկատվում է հակակրանք և օտարում քաղաքական կյանքից: Մարդու իրավունքների համընդհանուր հռչակագիրը ամրագրում է, որ «յուրաքանչյուր ոք ունի անմիջականորեն կամ ազատորեն ընտրված ներկայացուցիչների միջոցով իր երկրի կառավարմանը մասնակցելու իրավունք: Կառավարության իշխանության հիմ-

²⁹ 29 Հոդվածն ընդունվել է 25.01.2018:

Հոդվածը տպագրության է երաշխավորել ԵՊՀ քաղաքական ինստիտուտների և գործընթացների ամբիոնը

քում պետք է լինի ժողովրդի կամքը» [3]: Քաղաքացիների կամքի արտահայտությունը ժողովրդավարության հիմքն է:

Ընտրությունները ժողովրդավարական պետական ներկայացուցչական հաստատությունների կազմավորման կարևոր սկզբունքներից են: Ընտրությունների և ընտրական գործընթացի բնույթով կարելի է պատկերացում կազմել քաղաքական համակարգի և վարչակարգի էության և առանձնահատկությունների մասին: Ընտրությունների հետազոտությունը ենթադրում է մի շարք խնդիրների լուծում՝ կապված ընտրությունների անցկացման սկզբունքների, ազատ և արդար ընտրության չափանիշների, քաղաքական համակարգի այլ տարրերի հետ ընտրական համակարգերի փոխհարաբերության իմացության, արժևորման ու գնահատման հետ: Քաղաքականության սուբյեկտների ընտրական կամքի ձևավորման չափանիշները կարիք են գգում ցիվիլիզարիսիկ ընթացակարգերի: Այդ է պատճառը, որ ընտրական և հանրաքվեի իրավունքը հասարակության քաղաքական կյանքին անձանց քաղաքակիրթ մասնակցության և ժողովրդախիշխանության իրականացման կարևորագույն նախապայմաններից է: Այն ենթադրում է քաղաքականության սուբյեկտների ներգրավվածության տարբեր ձևեր, որոնք նպաստում են պետական կառավարման և տեղական ինքնակառավարման մարմինների ցիվիլիզարիսիկ լեգիտիմության հիմքերի ամրապնդմանը: Եթե ժողովրդավարական քաղաքական վարչակարգի պայմաններում ընտրությունները կարևոր դեր են խաղում քաղաքական համակարգի կայունության համար, ապա ոչ ժողովրդավարական համակարգերում ընտրություններն էական տեղ չունեն հասարակության քաղաքական կյանքում: Ժողովրդավարական ավանդույթներ և հաստատություններ ունեցող երկրներում ընտրություններն իսկապես էական դեր են խաղում հասարակության քաղաքական կյանքում: Ընտրությունները լիարժեք կարող են իրականացնել իրենց գործառույթները միայն այն ժամանակ, երբ վերածվում են ժողովրդավարության հիմնարար ինստիտուտի, քաղաքացիների քաղաքական իրավասուբյեկտության իրականացման եղանակի, պետական կարգի սահմանադրական հիմքի: Ընտրական իրավունքի ձևական-իրավաբանական և իրավաքաղաքական տեսանկյունների փոխապայմանավորվածությունը, ըստ Յու. Վեդենեևի, պայմանավորված է նրանով, որ, եթե ընտրությունները քաղաքական ինստիտուտ և գործընթաց են, ապա ընտրական իրավունքը դրանց իրավաբանական համակարգն է [4]:

Ընտրական իրավունքի սկզբունքներն ամրագրված են 1948թ. մարդու իրավունքների համընդհանուր հռչակագրում, 1966թ. քաղաքացիական և քաղաքական իրավունքների մասին միջազգային դաշնագրում և այլ փաստաթղթերում: Ընտրական իրավունքի սկզբունքները ներառում են մի քանի կարևոր գաղափարներ, որոնց առկայության դեպքում միայն ընտրությունները ձանաչվում են որպես ազատ, արդար և թափանցիկ: Հենց ազատ և արդար ընտրություններն են ոչ միայն վարչակարգի՝ ժողովրդավարական արժեքներին հավատարմությունը պարզելու փորձություններ, այլև դրանք ընտրողներին կարևորագույն հնարավորություններ են տալիս թուլացնել կամ վերացնել ավտորիտար կառավարության իշխանությունը [5]:

Ընտրություններն անցկացվում են ընտրական իրավունքի իրականացման՝ ազատության և կամավորության սկզբունքների հիման վրա: Ոչ ոք իրավունք չունի պարտադրելու ընտրողին քվեարկելու որևէ թեկնածուի (կուսակցության) օգտին կամ դեմ, ինչպես նաև հարկադրելու ընտրողին մասնակցելու կամ չմասնակցելու ընտրություններին [6]: Համաձայն Ռ. Դալի՝ ընտրության ազատությունը բացառում է բռնությունը: Ընտրության ազատությունը տարբեր թեկնածուների միջև ընտրության իրավունքն ու հնարավորությունն է: Բռնությունը կամ հարկադրանքը ենթադրում է ֆորսալ կամ իրական

ընտրության բացակայություն: Այսինքն՝ այլընտրանքները բացակայում են, թույլատրված չեն կամ հղի են բացասական հետևանքներով [7]: Ազատության չափանիշը ավելի կարևոր է, քանզի նախապայմաններ է ստեղծում ժողովրդավարական ընտրական գործընթացի համար: Առանց քաղաքական ազատությունները սահմանող նորմերի՝ դրանց անկողմնակալ կիրառման խնդիրը դառնում է անհիմաստ: Ազատ ընտրությունները բնութագրում են այնպիսի հատկանիշներ, ինչպիսիք են՝ խոսքի ազատությունը, հավաքների ազատությունը, միավորումների ազատությունը, օրենքի առջև բոլորի հավասարությունը, համընդհանուր և հավասար ընտրական իրավունքը, ակտիվ ու պասիվ ընտրական իրավունքն իրականացնելու նկատմամբ հետապնդման, սահմանափակման, բռնաճնշման բացակայությունը, քվեարկությանը մասնակցելու հնարավորությունը, սեփական քաղաքական և քաղաքացիական իրավունքների իրականացումը և այլն [8]: Յուրաքանչյուր ոք ունի իր կարծիքն ազատ արտահայտելու իրավունք: Արգելվում է մարդուն հարկադրել հրաժարվելու իր կարծիքից կամ փոխելու այն: Յուրաքանչյուր ոք ունի խոսքի ազատության իրավունք, ներառյալ՝ տեղեկություններ և գաղափարներ փնտրելու, ստանալու, տարածելու ազատությունը, տեղեկատվության ցանկացած միջոցով՝ անկախ պետական սահմաններից: Լրատվամիջոցների և տեղեկատվական այլ միջոցների ազատությունը երաշխավորվում է: Պետությունը երաշխավորում է տեղեկատվական, կրթական, մշակութային և ժամանցային բնույթի հաղորդումների բազմազանություն առաջարկող անկախ հանրային ռադիոյի և հեռուստատեսության առկայությունը և գործունեությունը [9]: Յուրաքանչյուր ոք ունի խաղաղ, առանց զենքի հավաքներին ազատորեն մասնակցելու և դրանք կազմակերպելու իրավունք: Բացօթյա տարածքներում կազմակերպվող հավաքներն օրենքով սահմանված դեպքերում անցկացվում են ողջամիտ ժամկետում ներկայացված իրազեկման հիման վրա: Ինքնաբերիկ հավաքների իրականացման համար իրազեկում չի պահանջվում: Հավաքների ազատությունը կարող է սահմանափակվել միայն օրենքով՝ պետական անվտանգության, հանցագործությունների կանխման, հասարակական կարգի պաշտպանության, առողջության և բարոյականության կամ այլոց հիմնական իրավունքների և ազատությունների պաշտպանության նպատակով [10]:

Յուրաքանչյուր ոք ունի այլոց հետ ազատորեն միավորվելու, ներառյալ աշխատանքային շահերի պաշտպանության նպատակով արհեստակցական միություններ ստեղծելու և դրանց անդամագրվելու իրավունք: Ոչ ոքի չի կարելի հարկադրել անդամագրվելու որևէ մասնավոր միավորման: Միավորումների ազատությունը կարող է սահմանափակվել միայն օրենքով՝ պետական անվտանգության, հասարակական կարգի, առողջության և բարոյականության կամ այլոց հիմնական իրավունքների և ազատությունների պաշտպանության նպատակով: Միավորումների գործունեությունը կարող է կասեցվել կամ արգելվել օրենքով սահմանված դեպքերում և կարգով՝ միայն դատարանի որոշմամբ [11]:

Ընտրություններից հետո պետք է լինեն օրենքով սահմանված բոլորքարկման հնարավորություններ, իսկ անհրաժեշտության դեպքում՝ ընտրությունների արդյունքների վերանայում և կրկնակի քվեարկության իրականացում: Նորմալ, արդար ընտրություններն ապահովում են իշխանության խաղաղ անցումը քաղաքական մի խմբից մյուսին և նպաստում ներկայացուցչական համակարգի ձևավորմանը:

Արդարությունն առաջին հերթին ենթադրում է անաչառություն: Արդարության բացակայությունը անհավասար պայմանների առկայությունն է, կամ հավասարների նկատմամբ տարբեր վերաբերմունքը՝ այսինքն ՁԼՄ-ների, ընտրական հանձնաժողովների և այլ հաստատությունների կողմից թեկնածուների հանդեպ կողմնակալ վերա-

բերմունքը: Արդարությունը ենթադրում է նաև անխտիր բոլոր թեկնածուների նկատմամբ նորմերի և կանոնների անկողմնակալ կիրառում, ինչպես նաև թեկնածուների միջև ռեսուրսների համեմատաբար հավասարաչափ բաշխում: Ընտրական և հանրաքվեի իրավունքը՝ որպես «փոխհամաձայնության կարևորագույն մեխանիզմ» [12], հնարավորություն է տալիս անձանց և նրանց միավորումներին իրականացնելու իրենց ցիվիլիզատիվ կամքը: Այսպիսով՝ իրենց «անմիջական» կամ «միջնորդավորված» մասնակցությունը բերելով քաղաքական որոշումների նախապատրաստման, ընդունման, իրականացման ու վերահսկման փուլերին:

Ժողովրդաիշխանության կարևոր ինստիտուտներից մեկը հանրաքվեն է: Այն ժողովրդի իշխանության իրականացման ուղղակի, անմիջական ձև է: Դրա միջոցով ընդունված որոշումները անբեկանելի են և ենթակա չեն վերանայման այլ օրենսդիր կամ վերահսկիչ մարմինների կողմից:

Հանրաքվեները լինում են տարբեր տեսակի [13]՝

1. Սահմանադրական
2. Համազգային
3. Համապետական

4. Տեղական, երբ լուծվում են տեղական նշանակության հարցեր, օրինակ՝ որևէ համայնքում ծագած որևէ խնդիր:

Ընտրական գործընթացների և ընտրական իրավունքի փոխհարաբերությունների համատեքստում տարբերակվում են՝ «ընտրական իշխանություն», «ընտրական դեմոկրատիա», «սուբյեկտիվ ընտրական իրավունք», «օբյեկտիվ ընտրական իրավունք», «ընտրական իրավունքի բովանդակություն», «ընտրական իրավունքի ձև», «ընտրությունների օբյեկտ», «ընտրությունների սուբյեկտ» և այլ հասկացություններ: Այսպես, օրինակ, «սուբյեկտիվ ընտրական իրավունք» իր մեջ ներառում է երկու իրավական ռեժիմներ, որոնք իրականացվում են ընտրական իրավունքի ակտիվ և պասիվ ձևերով: Ընտրողները, անկախ ազգությունից, ռասայից, սեռից, լեզվից, դավանանքից, քաղաքական կամ այլ հայացքներից, սոցիալական ծագումից, գույքային կամ այլ դրույթունից, ընտրելու և ընտրվելու իրավունք ունեն [14]: Ընտրական իրավունքի կարևոր սկզբունքներից մեկը համընդհանրության սկզբունքն է, որն ենթադրում է, որ ընտրություններին մասնակցելու իրավունք են ձեռք բերում երկրի բոլոր այն քաղաքացիները, որոնց նկատմամբ օրենսդրական սահմանափակումներ չկան:

Համընդհանուր ընտրական իրավունք ասելով՝ հասկանում ենք տվյալ հանրության՝ որոշակի տարիքի հասած քաղաքացիների ակտիվ ընտրական իրավունքի՝ ընտրելու իրավունքի առկայություն: Ակտիվ ընտրական իրավունքը քաղաքացու ընտրելու իրավունքն է: Ակտիվ ընտրական իրավունքի ձեռքբերման համար գործում են մի քանի սահմանափակումներ: Բացառություններ կարող են լինել դատարանի որոշմամբ անգործունակ ճանաչված անձինք, որոշ երկրներում նաև դատարանի որոշմամբ ազատազրկման դատապարտված և պատիժը կրող անձինք: Տարբեր ժամանակներում գոյություն են ունեցել գործուն ընտրական իրավունքը սահմանափակող ցենզեր, օրինակ՝ գույքային, կրթական, սեռային, կրոնական և այլն: Սակայն այսօր, որպես կանոն, պահպանվում է միայն տարիքային ցենզը, որը պետությունների մեծ մասում 18 տարեկանն է: Ակտիվ ընտրական իրավունքի ձեռքբերման համար երկար ժամանակ գործել է սեռային ցենզը, որը հիմնականում վերաբերվել է կանանց: Օրինակ՝ գոյություն են ունեցել գույքային, տարիքային, սեռային և կրոնական սահմանափակումներ: Մինչև 19-րդ դարի կեսերը ընտրություններին հիմնականում մասնակցում էին որոշակի սոցիա-

լական դիրք, ստատուս ունեցող մարդիկ, որոնք ունեին նաև որոշակի գույք: Հիմնավորումը կայանում էր նրանում, որ այդպիսի մարդիկ ավելի շահագրգռված են քաղաքականության մեջ մասնակցություն ունենալ: Սեռային սահմանափակումը վերացել է 20-րդ դարի 20-ական թվականներից: Շվեյցարիայում այն պահպանվում էր մինչև 1983 թ. և միայն դրանից հետո այնտեղ թույլատրվեց կանանց մասնակցությունը ընտրական գործընթացներում:

Առաջին երկիրը, որտեղ բոլոր չափահաս կանայք ընտրելու իրավունք են ստացել Նոր Զելանդիան էր՝ 1893 թ.: Նախքան այդ կանայք ընտրելու սահմանափակ իրավունք ունեին նաև Շվեդիայում, Մեծ Բրիտանիայում, Ֆինլանդիայում և ԱՄՆ որոշ նահանգներում: 19-րդ դարի վերջին և 20-րդ դարի սկզբին ստեղծվել են մի շարք միջազգային կազմակերպություններ, որոնք պայքարել են կանանց տղամարդկանց հետ հավասար ընտրական իրավունք ստանալու համար: Այդ պայքարի մասնակիցները կոչվում էին սուֆ-րաժիստներ: Առաջին համաշխարհային պատերազմից հետո գրեթե բոլոր արևմտյան երկրներում կանայք ընտրական իրավունք ստացան: Բացառություն են կազմել Ֆրանսիան և Շվեյցարիան, որտեղ կանայք ընտրական գործընթացներին մասնակցել կարողացել են համապատասխանաբար 1944 և 1979 թթ.: Ներկայումս կանայք ընտրելու իրավունք ունեն գրեթե բոլոր երկրներում: Հայաստանում կանայք ընտրանական իրավունք ունեն 1921-ից: Շատ երկրներում գործում է նաև բարոյականության ցենզը, որոշ երկրներում թմրամոլները, մայրությունից զրկված կանայք կամ դատարանի կողմից ազատազրկման դատապարտված մարդիկ իրավունք չունեն մասնակցել ընտրական գործընթացներին: Ներկա պայմաններում ակտիվ ընտրական իրավունքի հիմնական սահմանափակումը տարիքային ցենզն է: Որոշակիորեն բարձր տարիքային ցենզ սահմանվում է պասիվ ընտրական իրավունքի՝ ընտրվելու իրավունքի համար: Մեր օրերում օգտագործվող ցենզերից մեկը տվյալ տարածքում որոշակի ժամանակ բնակության ժամկետի ցենզն է [15]: Որպես կանոն, այս դեպքում սահմանվում է ավելի բարձր տարիքային շեմ: Իսկ ինչ վերաբերում է օբյեկտիվ ընտրական իրավունքին, ապա այն «սուբյեկտիվ ընտրական իրավունքի աղբյուրն է և իր մեջ ներառում է իրավաբանական նորմերի ամբողջությունը, որոնք սահմանում են ընտրական գործընթացի մասնակիցների իրավունքները, պարտականություններն ու պատասխանատվությունը» [16]:

Հավասար ընտրական իրավունքը ենթադրում է յուրաքանչյուր ընտրողի՝ ընտրությունների արդյունքների վրա ազդելու հավասար հնարավորություն: Հավասարությունը ապահովվում է «մեկ ընտրող, մեկ ձայն» սկզբունքով: Սույն սկզբունքի պահպանումն ապահովում է, որ յուրաքանչյուր քվե ունենա հավասար կշիռ և ազդեցություն, ինչպես նաև ընտրատեղամասերի այնպիսի բաժանում, որ յուրաքանչյուրում լինեն մոտավորապես հավասար թվով ընտրողներ:

Ուղղակի ընտրական իրավունքը նշանակում է քաղաքացու՝ անմիջականորեն ընտրելու կամ ընտրվելու իրավունք: Ազգային ժողովը, տեղական ինքնակառավարման մարմինները, բացառությամբ Երևան, Գյումրի, Վանաձոր համայնքների ղեկավարների, ընտրվում են անմիջականորեն՝ ընտրողների կողմից [17]:

Քվեարկությունը գաղտնի է: Ընտրողի համար քվեարկության գաղտնիությունը ոչ միայն իրավունք է, այլև պարտականություն: Գաղտնի ընտրությունը ենթադրում է քաղաքացիների կամարտահայտության վրա կողմնակի հսկողության բացառում: Այս սկզբունքի պահպանումն ապահովում է քաղաքացու ազատ կամարտահայտության սկզբունքը և քաղաքացին իր ընտրության մեջ կաշկանդված չի լինում որևիցե այլ հանգամանքով:

Ընտրական գործընթացում նշվում են հետևյալ հիմնական փուլերը [18].

1. Ընտրությունների նշանակում.

2. Ընտրատարածքների և ընտրատեղամասերի սահմանում:

Ընտրական տեղամասերը կազմավորում են քվեարկության օրվանից ոչ ուշ, քան 45 օր առաջ՝ հաշվի առնելով տեղական և այլ պայմաններ, նպատակ ունենալով առավել նպաստավոր պայմաններ ստեղծել քվեարկության համար: Քվեարկությունն անցկացնում է տեղամասային կենտրոնում՝ դրա համար կահավորված դահլիճում, սրահում, սենյակում և այլ տարածքում (այսուհետ՝ քվեարկության սենյակ): Քվեարկության սենյակի համար պատասխանատու է համայնքի ղեկավարը [19]:

3. ընտրական հանձնաժողովների ծնավորում:

Ընտրությունների կազմակերպման և անցկացման նպատակով կազմավորվում է ընտրական հանձնաժողովների եռաստիճան համակարգ՝

Կենտրոնական ընտրական հանձնաժողով,

Տարածքային ընտրական հանձնաժողովներ,

Տեղամասային ընտրական հանձնաժողովներ,

Ընտրական հանձնաժողովներն իրենց գործունեությունն իրականացնելիս անկախ են: Նրանց գործունեությանը որևէ միջամտություն արգելվում է: Նրանք իրենց լիազորությունները իրականացնում են օրինականության, կոլեգիալության և հրապարակայնության սկզբունքների հիման վրա, ինչպես նաև ապահովում են ընտրողների ընտրական իրավունքի իրականացումը և պաշտպանությունը [20]:

4. Ընտրողների գրանցում

Այս գործընթացը ՀՀ-ում հիմնականում իրականացնում են ոստիկանության անձնագրային բաժանմունքը: Հայաստանի Հանրապետության ընտրողների ռեգիստրի հիման վրա կազմվում է համայնքի ընտրողների ցուցակ՝ ըստ ընտրական տեղամասերի, որում ընդգրկվում են սույն օրենսգրքի 2-րդ հոդվածի համաձայն՝ համապատասխան ընտրության ժամանակ ընտրելու իրավունք ունեցող անձինք:

Յուրաքանչյուր ընտրության դեպքում ընտրողը կարող է ընդգրկվել ընտրողների միայն մեկ ցուցակում և միայն մեկ անգամ [21]: Ընտրողների ցուցակները կազմվում են ըստ ընտրողների հաշվառման վայրի հասցեների: Ազգային ժողովի ընտրությունների ժամանակ տեղամասի ընտրողների ցուցակում համարակալման շարունակականությամբ, ըստ առանձին բաժինների ներառվում են նաև ըստ գտնվելու վայրի ընտրողների, հաշվառում չունեցող ընտրողների, ընտրական տեղամասեր գործողվող ոստիկանության ծառայողների ցուցակները [22]:

5. Թեկնածուների առաջադրում:

Թեկնածուները կարող են ինքնառաջադրվել, կարող են առաջադրվել քաղաքացիական նախաձեռնության կողմից, ինչպես նաև քաղաքական կուսակցությունների և դաշինքների կողմից: Թեկնածուների առաջադրումից հետո սկսվում է նախընտրական քարոզչության փուլը:

6. Նախընտրական քարոզչություն:

Նախընտրական քարոզչության ժամանակաշրջանը սկսվում է ընտրություններին մասնակցող կուսակցությունների ընտրական ցուցակների, թեկնածուների գրանցման համար օրենսգրքով սահմանված ժամկետի վերջին օրվան հաջորդող 7-րդ օրը և ավարտվում քվեարկության օրվանից մեկ օր առաջ: Քվեարկության և դրան նախորդող օրը քարոզչությունը հրապարակային ելույթների, հրապարակային միջոցառումների, ինչպես նաև տպագիր մամուլի, վերգետնյա եթերային հեռարձակում իրականացնող ռադիոընկերությունների և հեռուստաընկերությունների (այդ թվում՝ արբանյակային հեռարձակման ժամանակ) արգելվում է:

Ընտրական հանձնաժողովի անդամներին արգելվում է նախընտրական քարոզչություն կատարել և ցանկացած բնույթի քարոզչական նյութ տարածել [23]:

7. Քվեարկություն:

Տեղամասային ընտրական հանձնաժողովի նախագահը քվեարկության օրը՝ ժամը 8.00-ին, հայտարարում է քվեարկության սկիզբը և թույլատրում ընտրողների մուտքը քվեարկության սենյակ: Հանձնաժողովի նախագահը կազմակերպում և վերահսկում է քվեարկության անցկացումը, անհրաժեշտության դեպքում օժանդակում գործառույթ իրականացնող անդամներին, փոխարինում նրանց և մասնագետին ժամանակավոր բացակայության դեպքում: Հանձնաժողովի նախագահի հանձնարարությամբ հանձնաժողովի քարտուղարը գրառումներ է կատարում գրանցամատյանում, օժանդակում գործառույթ իրականացնող անդամներին, փոխարինում նրանց և մասնագետին ժամանակավոր բացակայության դեպքում: Հանձնաժողովի նախագահի հանձնարարությամբ այդ պահին գործառույթ չիրականացնող հանձնաժողովի անդամը փոխարինում է մասնագետին ժամանակավոր բացակայության դեպքում:

Արգելվում է տեղամասային կենտրոն զենք, զինամթերքով մուտք գործել:

Ձինժառայողները, ազգային անվտանգության և ոստիկանության գործերում ծառայողները տեղամասային կենտրոն մուտք են գործում ոչ շարային կարգով՝ առանց զենքի, զինամթերքի: Քվեարկության բնականոն ընթացքի վտանգման դեպքում տեղամասային կենտրոն զենքով մուտք գործել կարող են միայն ոստիկանության ծառայողները՝ տեղամասային ընտրական հանձնաժողովի նախագահի թույլտվությամբ:

Եթե քվեարկության սենյակում գտնվող ընտրողների թիվն այնքան է, որ ակնհայտորեն խաթարվում է քվեարկության բնականոն ընթացքը, ապա ընտրական հանձնաժողովի նախագահն իրավունք ունի սահմանափակելու քվեարկության սենյակում միաժամանակ գտնվող ընտրողների թիվը, բայց ոչ պակաս, քան 15 ընտրող՝ ընտրողներին քվեարկության սենյակ թողնելով հերթով՝ մեկ-մեկ: Ընտրական հանձնաժողովի կողմից սույն մասի կատարումն ապահովելու անհնարինության դեպքում ընտրական հանձնաժողովի նախագահի պահանջով այն իրականացվում է ոստիկանության օժանդակությամբ: Քվեարկության սենյակում իրավունք ունի միաժամանակ ներկա գտնվել յուրաքանչյուր զանգվածային լրատվության միջոցը ներկայացնող մեկ լրագրող և մեկ լուսանկարիչ կամ տեսաձայնագրման մեկ օպերատոր:

8. Չայների հաշվարկում և արդյունքների ամփոփում

Տեղամասային ընտրական հանձնաժողովի նախագահը քվեարկության օրը՝ ժամը 20.00-ին, հայտարարում է քվեարկության ավարտի մասին և արգելում ընտրողների մուտքը քվեարկության սենյակ: Հանձնաժողովը քվեարկության սենյակում գտնվող ընտրողներին քվեարկելու հնարավորություն է տալիս, որից հետո հանձնաժողովի նախագահը փակում է քվեատուփի ճեղքը: Տեղամասային ընտրական հանձնաժողովի նախագահը և քարտուղարը պարկը, ընտրողների ցուցակների փաթեթը, չօգտագործված քվեարկության ծրարների փաթեթը, չօգտագործված քվեաթերթիկները, քվեարկության արդյունքների արձանագրության երկու օրինակը, գրանցամատյանը, հանձնաժողովի կնիքը, տեխնիկական սարքավորումը քվեարկության ավարտից հետո՝ ոչ ուշ, քան 14 ժամվա ընթացքում ներկայացնում են տարածքային ընտրական հանձնաժողով՝ Կենտրոնական ընտրական հանձնաժողովի սահմանած կարգով:

9. Արդյունքների վերջնական ամփոփում և պաշտոնական հրապարակում:

Կենտրոնական ընտրական հանձնաժողովը քվեարկության օրվանից հետո՝ 7-րդ օրը, հիմք ընդունելով քվեարկության արդյունքների վերաբերյալ արձանագրությունը, դատարանի վճիռները, հանձնաժողովներում ստացված դիմումների (բողոքների) քննարկ-

ման արդյունքով ընդունած որոշումները, տեղամասային ընտրական հանձնաժողովների գրանցամատյաններում քվեարկության օրն արձանագրված խախտումների վերաբերյալ ընտրատարածքային ընտրական հանձնաժողովների որոշումները, քվեարկության արդյունքների վերաբերյալ ընդունած որոշումները ամփոփում է ընտրության արդյունքները և ընդունում որոշում ընտրությունների արդյունքների վերաբերյալ [24]:

Ընտրական գործընթացի կազմակերպումը, հիմնվելով ընտրական իրավունքի սահմանադրական սկզբունքների ընդունման և կիրառելիության վրա, ժողովրդավարական հասարակարգի կայացման կարևորագույն նախադրյալներից մեկն է: Առանց ընտրության արդարացի կազմակերպման՝ տվյալ հասարակության զարգացումը հնարավոր չէ իրականացնել, քանի որ ընտրությունների միջոցով է ձևավորվում երկրի կառավարման համակարգը: Հարկավոր է ընտրական գործընթացների մասնակցության մեջ բարձրացնել քաղաքացիների գիտակցության մակարդակը և թույլ չտալ, որ ցածր գիտակցությունը հանգեցնի կենտրոնացված իշխանության ձևավորմանը: Միայն այդ դեպքում կարող ենք պայքարել հասարակության մեջ արմատացած ընտրակեղծիքների և ընտրախախտումների դեմ, որոնք ավելի են խորացնում կոռուպցիոն ռիսկերը, կաշառակերությունը, անհատի իրավունքների և ազատությունների սահմանափակումը, զանազան հարցումների ցածր ցուցանիշները տվյալ հասարակությունում: Ազատ և արդար ընտրություններ անցկացնելու միջոցով քաղաքական իշխանություն մուտք կգործեն կրթված և մասնագիտական պատրաստություն ունեցող ավելի մեծ թվով անհատներ:

Ընդհանրապես կոռուպցիոն ռիսկերը սողոսկում և քայքայում են հասարակական-քաղաքական կյանքի յուրաքանչյուր ոլորտ՝ սոցիալական, քաղաքական, մշակութային, ռազմական, և այդ ամենից գերծ մնալու համար մենք պետք է իսպառ վերացնենք աքսենտիզմն ի հայտ բերող տարրերը, որի արդյունքում հասարակական-քաղաքական կյանքում քաղաքական ապատիան գերիշխող դիրք է զբաղեցնում: Քաղաքական ապատիան հանգեցնում է քաղաքացիների օտարումը քաղաքական կյանքից, հիասթափությանը և անվստահությանը քաղաքական ինստիտուտների և իշխանության նկատմամբ: Հարկավոր է բարձրացնել քաղաքացիների ձեռնհասության մակարդակը, վերականգնել իրենց համար ցանկալի արդյունքի հասնելու հավատը: Իսկ հավատի կորստի և անվստահության մեխանիզմի առաջացմանը նպաստում են քաղաքականությունը կերտողների կեղծ խոստումները, որն էլ իր հերթին հանգեցնում է քաղաքացիների համար ընտրությունների արդյունքների ցածր նշանակությանը:

ԾԱՆՈԹԱԳՐՈՒԹՅՈՒՆ

1. Քաղաքացիական ներգրավվածության և մասնակցության ինստիտուցիոնալացման հեռանկարները զարգացման ծրագրերի համատեքստում (հայաստանյան փորձի վերլուծություն), Եր., 2008:
2. Շափաղայան Հ., Քաղաքական մասնակցության արդի հիմնախնդիրները, ԵՐ., 2007, էջ 46:
3. Մարդու իրավունքների համընդհանուր հռչակագիր, 10.12.1948 թ., հոդված 21:
4. Ալեքսանյան Ա., Ցիվիլիարխիկ դեմոկրատիա, Եր., 2005, էջ 69-70:
5. Nevitte. N and Canton S., The Role of Domestic Observers Journal of Democracy, 1997, p. 47- 61.
6. ՀՀ ընտրական օրենսգիրք, հոդված 4, 25.05.2016
7. «Քաղաքագիտություն», ուս. ձեռնարկ ՀՀ բուհերի համար, ԵՐ., 2006, էջ 502:
8. Նույն տեղում, էջ 502-503:

9. ՀՀ սահմանադրություն, 06.12.2005, հոդված 27:
10. ՀՀ սահմանադրություն, (փոփոխություններ 06.12.2015), հոդված 44:
11. Նույն տեղում, հոդված 45:
12. Ալեքսանյան Ա., նշվ. աշխ., էջ 68-69:
13. Աբրահամյան Հ., Ժողովրդավարությունը և քաղաքական կուսակցությունները: Ուս. ձեռնարկ, ԵՐ., 2009, էջ 40:
14. ՀՀ ընտրական օրենսգիրք, հոդված 3, 3-րդ կետ, 25.05.2016:
15. «Քաղաքագիտություն», էջ 491-492:
16. Ալեքսանյան Ա., նշվ. աշխ., էջ 69:
17. ՀՀ ընտրական օրենսգիրք, հոդված 5, 25.05.2016:
18. «Քաղաքագիտություն», էջ 492:
19. Ընտրությունների անցկացման մասնագիտական դասընթացների ուսումնական ձեռնարկ, էջ 10: տե՛ս <http://res.elections.am/images/doc/TEC-guide2016.pdf> հասանելի՝ 20.11.2017:
20. Նույն տեղում, էջ 10:
21. ՀՀ ընտրական օրենսգիրք, հոդված 10, 1-ին և 2-րդ կետեր, 25.05.2016:
22. ՀՀ ընտրական օրենսգիրք, հոդված 11, 1-ին կետ, 25.05.2016:
23. Ընտրությունների անցկացման մասնագիտական դասընթացների ուսումնական ձեռնարկ, էջ 9-10:
24. ՀՀ ընտրական օրենսգիրք, հոդված 75, 6-րդ կետ, 25.05.2016:

ԱՄՓՈՓԱԳԻՐ
Ընտրական գործընթացին ներգրավվումը՝
որպես քաղաքական մասնակցության տարատեսակ
(ՀՀ օրինակով)
Առնակ Սարգսյան

Ընտրությունների և ընտրական գործընթացի բնույթով կարելի է պատկերացում կազմել քաղաքական համակարգի ու վարչակարգի էության և առանձնահատկությունների մասին: Տվյալ հասարակության զարգացումը հնարավոր չէ իրականացնել՝ առանց ընտրության արդարացի կազմակերպման, քանի որ ընտրությունների միջոցով է ձևավորվում երկրի կառավարման համակարգը: Հարկավոր է ընտրական գործընթացների մասնակցության մեջ բարձրացնել քաղաքացիների գիտակցության մակարդակը և թույլ չտալ, որ ցածր գիտակցությունը հանգեցնի կենտրոնացված իշխանության ձևավորմանը: Ընտրություններն անցկացվում են ընտրական իրավունքի իրականացման՝ ազատության և կամավորության սկզբունքների հիման վրա: Ոչ ոք իրավունք չունի պարտադրելու ընտրողին քվեարկել որևէ թեկնածուի (կուսակցության) օգտին կամ դեմ, ինչպես նաև հարկադրելու ընտրողին մասնակցել կամ չմասնակցել ընտրություններին:

Ազատ և արդար ընտրություններ անցկացնելու միջոցով քաղաքական իշխանություն մուտք կգործեն կրթված և մասնագիտական պատրաստություն ունեցող ավելի մեծ թվով անհատներ:

РЕЗЮМЕ

**Вовлечение в избирательный процесс как тип политического участия
(на примере РА)
Арнак Саргсян**

Ключевые слова: *избирательный процесс, референдум, активное избирательное право, пассивное избирательное право, принципы избирательного права, этапы избирательного процесса.*

Принимая во внимание характер выборов и избирательного процесса, можно опираться на сущность и особенности политической системы и режима. Без справедливой организации выборов развитие этого общества невозможно, потому что система управления страной формируется путем выборов. Необходимо повысить уровень сознательности граждан в избирательном процессе и предотвратить низкую осведомленность о формировании централизованной власти. Выборы проводятся на основе осуществления права голоса, свободы и добровольчества. Никто не имеет право налагать голосование на или против какого-либо кандидата (партии), а также заставлять избирателей участвовать или не участвовать на выборах.

Проводя свободные и справедливые выборы, все более образованные и профессионально подготовленные лица войдут в политическую власть.

SUMMARY

**The electoral process involvement as a type of the political participation
(on the example of the RA)
Arnak Sargsyan**

Keywords: electoral process, referendum, active electoral right, passive electoral right, principles of electoral right, stages of electoral process.

In terms of the nature of the elections and the electoral process we can draw on the essence and peculiarities of the political system and the regime. Without the fair organization of the elections the society cannot develop as the governance system of a country is formed through elections. It is necessary to increase the level of citizens' consciousness in the electoral process and prevent the low awareness of the formation of a centralized government. Elections are held on the basis of the realization of the right to vote, freedom and volunteerism. No one has the right to compel the voter to vote for or against any candidate (party), or compel voters whether to participate or not in elections.

By holding free and fair elections, more and more educated and professionally trained individuals will enter the political power.